

आकाशवाणी जयपुर-अजमेर
प्रादेशिक समाचार
दिनांक 01.08.2025 समय: 18.45 बजे

- प्रधानमंत्री नरेन्द्र मोदी काल वाराणसी ऊं देश रा 9 करोड़ 70 लाख किसानां रा खातां मांय पीएम सम्मान निधि रा तैत 20 हजार 500 करोड़ रुपया भेजेलां
- नुवा उपराष्ट्रपति रो चुनाव 9 सितम्बर ने व्हेला-चुनाव आयोग कार्यक्रम रो ऐलाण कीनों
- स्वतंत्रता दिवस रे मौके राज्य स्तर रो जळसो जोधपुर मांय राख्यो जावेलानां
- प्रदेश रा घणखर हलकां मांय भारी बारिश ऊं काल ऊं साता मिलण रा आसार

000

प्रधानमंत्री किसान सम्मान निधि री 20वीं किस्त काल जारी करी जावेलानां प्रधानमंत्री नरेन्द्र मोदी उत्तरप्रदेश रा वाराणसी मांय राख्या जावण वाळा कार्यक्रम मांय आ किस्त जारी करेलां ई रा तैत देश रा 9 करोड़ 70 लाख किसानां रा खातां मांय 20 हजार 500 करोड़ रुपया री रकम भेजी जावेलानां ई सागे ई प्रधानमंत्री किसान सम्मान निधि रा तैत हाल ताई भेजी ज्यी रकम 3 लाख 90 हजार करोड़ रुपया ऊं बत्ती व्हे जावेलानां केन्द्रीय कृषि मंत्री शिवराज सिंह चौहान बत्ता ऊं बत्ता किसानां ऊं ई कार्यक्रम ऊं जुड़बा री अरज कीनी हैं

.....

प्रदेश मांय ई 75 लाख किसानां रा खातां मांय 1600 करोड़ रुपया ऊं बत्ती रकम भेजी जावेलानां बांसवाड़ा मांय राख्या जावण वाळा राज्य स्तर रा कार्यक्रम मांय मुख्यमंत्री भजनलाल शर्मा ई शामिल व्हेलां सहकारिता मंत्री गौतम कुमार दक आज कार्यक्रम री ठोड़ रो दौरा कर र व्यवस्थावां रो जायजो लीनों ई मौके वे कह्यो के सरकार किसानां री खुशहाली बधावण सारु लगातार कोशिश कर रही हैं

.....

जोधपुर मांय राख्या जावण वाळा कार्यक्रम मांय केन्द्रीय पर्यटन मंत्री गजेन्द्र सिंह शेखावत अर अजमेर मांय राख्या जावण वाळा कार्यक्रम मांय केन्द्रीय कृषि राज्य मंत्री भागीरथ चौधरी ई शामिल व्हेलां

000

निर्वाचन आयोग उपराष्ट्रपति ओहदा सारु चुनाव रा कार्यक्रम रो ऐलाण कर दीनो हैं चुनाव 9 सितंबर ने व्हेलां ई सारु 7 ऊं 21 अगस्त ताई पर्चा दाखिल कर्या जा सकेलां नाम 25 अगस्त ताई पाछा लिया जा सकेलां 9 सितम्बर ने संवारे 10 ऊं सिंज्यां 5 बजां ताई वोट पड़ेलां चुनाव मांय राज्यसभा अर लोकसभा रा चुणी ज्या सदस्य वोट देवेलानां

000

भारतीय राष्ट्रीय भुगतान निगम-एन.पी.सी.आई. आज यूनिफाइड पेमेंट्स इंटरफ़ेस-यूपीआई रा नुवा नियम लागू कर दीनां नुवा कायदां रे मुजब हर लेन-देन ऊं पैली रकम हासिल करण वाळा रो नाम रकम भेजण वाळा ने बतायो जावेलानां यूपीआई रे जरिए एक दिन मांय 50 दफा बैंक खाता मांय जमा रकम री जाणकारी करी जा सकेलां

000

प्रदेश मांय पड़बा री शंका वाळा स्कूल भवनां अर आंगनबाड़ी केन्द्रां री पिछाण सारु सुरक्षा सर्वेक्षण अभियान चलायो जा रह्यो हैं ई रा तैत आं भवनां री सुरक्षा ऑडिट करी जा रही हैं ई सर्वे रा तैत भीलवाड़ा जिला मांय करीब 2 हजार 900 स्कूलां री जांच करायी ज्यी जिला कलेक्टर जसमीत सिंह संधू बतायो के पड़बा लायक हालत मांय मिल्या कक्षा-कक्षां ने बंद कर दिया ज्या हैं

.....

श्रीअन्न यानि मोटा अनाज सदियां ऊं राजस्थान री खाण-पीण री संस्कृति रो अटूट हिस्सो रह्यो हैं जनता ने मोटो अनाज आसानी ऊं मुहैया करावण अर इण ने काम लेवणो बधावण री सोच सागे राज्य

सरकार बजट मांय मोटा अनाज री दुकानां खोलण रो ऐलाण कीनो हों ई रा तैत राज्य मांय हाल ताई 74 दुकानां खोली जा चुकी हैं पेश है एक रपट –

.....
प्रधानमंत्री नरेन्द्र मोदी 79वां स्वतंत्रता दिवस समारोह मांय दिया जावण वाळा वां रा भाषण सारु जनता ऊं विचार अर राय मांगी हैं सोशल मीडिया हैंडल एक्स माथे पोस्ट मांय प्रधानमंत्री कह्यो के 15 अगस्त ने लाल किला ऊं भाषण सारु वे देश री जनता रा विचार जाणबा री मर्जी राखे हैं राय माय जीओवी ओपन फोरम अर नमो एप माथे दी जा सके हैं

000

राज्य स्तर रो स्वतंत्रता दिवस समारोह ई दफा जोधपुर रा बरकतुल्ला खां स्टेडियम मांय राख्यो जावेलां मुख्यमंत्री भजनलाल शर्मा की मौजूदगी मांय व्हेवण वाळा ई जळसा मांय मारवाड़ री अपणायत, सांस्कृतिक विरासत अर रीति-रिवाज निजर आवेलां संसदीय कार्यमंत्री जोगाराम पटेल आज जोधपुर मांय जळसा री ठोड़ रो दौरा कर र तैयारियां रो जायजो लीनों श्री पटेल कह्यो के स्वतंत्रता दिवस वीर बलिदानियां रा अतुलनीय योगदान ने याद करण रो दिन है अर ओ हर रहवासी ने देश रा प्रति मान महसूस करण रो मौको देवे हैं

संसदीय कार्यमंत्री जोधपुर मांय राख्यी ज्या सम्पूर्णता अभियान सम्मान समारोह मांय ई शामिल व्ह्यां वे कह्यो के पश्चिम ज़ोन मांय शेरगढ़ अव्वल रह र प्रदेश रो मान बधायो हैं

000

अगस्त महीना रा पहला सप्ताह मांय विश्व स्तनपान सप्ताह मनायो जावे हैं बच्चां ने कुपोषण ऊं बचावण अर वां रा शरीर अर दिमाग रा बेहतर विकास सारु ओ सप्ताह असरदार जाग जगावण रो तरीको हैं प्रदेश मांय ई ई दौरान न्यारा-न्यारा कार्यक्रम राख्या जा रह्या हैं चिकित्सा अर स्वास्थ्य विभाग मांय प्रजनन अर बाल स्वास्थ्य रो काम देख रही निदेशक डॉ. मधु रतेश्वर बतायो के माँ रो दूध बच्चां सारु अमृत बरोबर व्हे हैं वे बतायो के स्तन ऊं दूध पावण ने बधावो देवण अर ई बारा मांय जाग जगावण सारु खास सत्र राख्या जावेलां

.....
डूंगरपुर मांय आज रोज़गार मेळो लगायी ज्यों इण मांय राजस्थान, गुजरात अर मध्यप्रदेश री 25 ऊं बत्ती कम्पनियां 8 हजार ओहदां सारु उम्मीदवार चुण्यां जिला कलेक्टर अंकित कुमार सिंह बतायो के नौजवानां मांय रोज़गार मेळा सारु खास उमाव निजर आयो अर कम्पनियां कानी ऊं वां री पसंद रा उम्मीदवारां ने मौके ई नौकरी लागण रा कागज़ात दिया ज्यां

000

ई साल राष्ट्रीय सांख्यिकी कार्यालय-एन.एस.ओ. री 75वीं वर्षगांठ मनायी जा रही हैं ई सिलसिला मांय सालभर रा कार्यक्रम राख्या जा रह्या हैं आज अजमेर मांय खून दान रो शिविर लगाई ज्यों इण मांय 75 यूनिट खून भेळो करी ज्यों

000

राज्य रा घणखर हलकां मांय काल ऊं भारी बारिश ऊं साता मिलण रा आसार है, हालांकि 3 अगस्त ऊं नुवो परिसंचरण तंत्र बणबा ऊं 6 अगस्त ताई भरतपुर अर जयपुर संभाग मांय जोरदार मेह बरसबा री संभावना हैं ई बीचे श्रीगंगानगर मांय मोड़ी रात सरु व्ही बिरखा आज ही चालती रहीं सिरोही जिला मांय ई केई ठोड़ा रिमझिम बिरखा व्हीं लारला 24 घंटां मांय घणखर ठोड़ां हल्की ऊं मझला दर्जा री बरसात व्ही, जदके कटे-कटे जोरदार मेह बरस्यो

चूरु जिला रा तारानगर मांय सब ऊं बत्ती बरसात व्हीं म्हाणा खबरनवीस बतायो के ज़िला रा राजगढ़, रतनगढ़, सुजानगढ़ अर सादुलपुर मांय ई झमाझम बरसात व्हीं

.....
हनुमानगढ़ ज़िला रा नोहर मांय 14 अर श्रीगंगानगर रा अनूपगढ़ मांय 13, धौलपुर रा सरमथुरा अर सीकर रा रामगढ़ शेखावतान मांय 12-12 सेंटीमीटर पाणी बरस्यो धौलपुर मांय पार्वती नदी मांय घणो पाणी उफण रह्यो हैं गृह राज्यमंत्री जवाहर सिंह बेढम धौलपुर मांय भारी बारिश रा असर वाळा हलकां रो आज दौरा कीनों